

四庫全書

集部

欽定四庫全書

篁墩文集卷六十六

明 程敏政 撰

詩

送張汝弼駕部知南安

吾友人中龍落落張東海起家兵曹郎回翔十餘載  
竭分五馬符袍帶荷恩改迨遞南安城橫浦一川匯  
知君足儒吏舉筆見丰采想當行縣時江天凍雲變  
百丈大庾山梅花燦珠蕾折寄與詩來都人正延待

東海嘗為予賦晴洲已而失之云有稿在以行遽不暇檢許付其子新安貢士宏宜以來因詩及之懼其忘也

三樂為晉陵胡叔虞賦

落落媯公孫遠有叔虞子處世寧無才平居不干仕一觴與一詠顧我方樂只此身非草木有生胡弗喜而況得為男已歷好年紀興來鼓三終所得亦云侈茫茫天地間豈不解同是永日行畏途沈酣未知止千載鹿裘

翁見取尼山氏長歌念伊人迢遙隔州里

題黃帝廣成子問道圖

憶昔廣成子講道崆峒山抗顏為帝師相與煉九還坐  
令千歲人綠髮而朱顏一朝乘龍去下顧悲塵寰藥鑪  
莽猶存逸駕不可扳茲事傳已久無乃空投難靈均賦  
遠遊魂銷汨羅灣鄒訢注參同寂寞蓬萊班我讀古仙  
經一一度且慳或恐妙契者不在文詞間靈洞何幽幽  
鼎湖亦潺潺勝境雖足愛賦予誠疎頑

尼山高一首壽闕里孔公伯處士

公伯羅洗馬  
明仲婦翁也

尼山高高嶙峋千年孕此大聖人聖人一去聖澤新雲  
初玉樹何振振公伯先生號賢者韋布不沾京洛塵生  
時分値祖庭檜荏苒于今六十春蒼髯勢欲凌秋旻朔  
風吹地才一日先生笑坐開芳辰戲綵兒孫行遶身攜  
壺陸續來親賓崧高一紙馳獻壽知有內翰聯佳姻新  
詩在眼酒入唇先生陶然岸烏巾家山喬木色不改百  
歲願作無懷民

琴鶴東人為廣人何式之賦

小攬山中盛丘壑竭有幽人恣行樂坐間時弄七弦琴  
到處還隨九皋鶴春波澹蕩風日清耳畔忽聞環佩聲  
古人雖往古音在坐使一川魚鳥驚石徑盤回絕塵侶  
砂頂昂藏縞衣舉幽人鼓掌一和之萬里閒雲自容與  
君不見蜀川太守報政成一鶴一琴隨馬行又不見義  
山詩人殺風景煮鶴燒琴對佳境幽人不求祿二千幽  
人不賦西崑篇祇與雙清作東道見者一任稱何仙燕

歌趙舞人爭愛畢竟誰賓復誰介何如琴鶴共平生清  
譽長傳嶺南界

歸田樂卷為彭彥充儀制賦

拂衣何太早人惜漢彭郎許國身猶健還山樂自長分  
泉栽杞菊升壟看牛羊莫和陶翁句長歌與世忘

蒼雪難侵鬢紅塵自息勞高眠穿北牖舒嘯入東臯久  
辦青山屐初嘗白社醪海鷗機事少應識舊儀曹

春坊齋夜追憶舊時在翰林東署與諸君子喜

雪焚香聯句之作奉簡亨甫鼎儀世賢三太史  
齋榻遊塵淨宮城刻漏殘不知芸閣夢何似桂坊寒旅  
夕鑪香在經春雪意難同袍應念及燈火舊詩壇

藻軒為錦衣千戶吳孟章賦

將軍心地清如藻小結幽居遠六街倚榻高寒疑近水  
閉門空翠欲侵階擷芳曾過黃泥坂寄傲難同畫舫齋  
聖代只今需補袞知君才副九重懷

送延都運六十致仕得何字



金帶朱衣拜寵多，乞身寧待鬢雙皤。  
民思久繫棠陰茂，國計新饒海上  
鰲。白社預鈔栽菊譜，滄浪隨唱濯纓歌。  
不知勇退青雲士，屈指如公得幾何。

挽胡孺人

刑部黃員外  
文琰之母

鬢絲初覺早霜凌，豈意年來不自勝。  
蓬壁尚疑聞夜杼，蕙帷那復候晨興。  
推恩子望新鸞誥，偕老人傷舊鴈繒。  
寂寞祁閭山下路，一邱松栢鎖寒藤。

小兒彌月承羅洗，馬餉鶴歌以答之。

仙禽一夕乘風至清氣朝來滿庭次見客馴然了不驚  
學舞時時鼓雙翅丹砂入頂色猶淺一聲更有凌雲思  
我家生男一月餘每遇高人出相示皆云骨相如長郎  
坐上啼聲已堪試犀錢玉果競相投隨俗惟應悅姬侍  
司經大夫公遠後輟自潤筆來相贄謂此鶴齡千歲長  
眼中定欲徵君嗣大夫久作瀛洲仙許我平生可同志  
頂砂疑是鶴前身令器而今已三四松陰永日和鳴  
螽羽開祥豈無自乃知此鶴最宜人茅君本號還丹使

山雞野鶩竟何有大籠滿貯長安肆中年不顧縻好爵  
看鶴生孫乃吾事兩郎他日弄雛成再拜還酬大夫賜  
洗馬額有朱志如  
鶴然故詩及之

奉詔儲材卷送翰長王謝二先生

館閣儲材自祖宗兩公承詔任陶鎔南朝世譜衣冠盛  
西掖官聯雨露濃瑞應奎光開五夜功期文史足三冬  
不知此夜門牆下多少英賢賦九重

蘭竹圖題贈蕭給事文冊乃郎赴秋試

湘皋春婉婉居然見雙清幽香下覆之翠條仰而承高  
石既磊砢新泉亦泓澄臨風況君子去住有餘情

送李士欽尚寶持節冊封楚府次沈廷美韻

曉承天語下丹霄周室班封四牡勞同姓地分南嶽重  
殊方人仰北辰高朝廷近侍傳司璽江漢風流擁使旄  
預想過家歸路便朱門喬木映宮袍

送王昱知榮縣

幾載儒衫困一經除書新捧下彤庭遠趨蜀道三千里

上應郎官十五星  
黉舍秋風興士子  
畚田春雨勤租丁  
政成他日蒙推薦  
尚及才人兩鬢青

送董子仁給事出使琉球

萬里乘槎羨董生  
手持龍節氣崢嶸  
遠憑主上班恩到  
坐使陪臣謝禮成  
番貨不收沙上市  
粵船長下水邊城  
知君可副中朝望  
一寸心隨漢月明

清明謁西陵  
飴昌平劉奉祠家次韻李世賢太

史

何處同君寄一餐  
昌平縣裏舊祠官  
停驂已忘征途倦  
撫景惟慙得句難  
百辟分班朝太寢  
五雲回首認長安  
行人盡說清明近  
不似常年節氣寒

二十五日朝陵次世賢太史

二聖仙陵隔路岐  
松林燈火夜差池  
中天絳闕長相峙  
夾道蒼山晚更奇  
地迴易看星次轉  
天寒不覺露華滋  
一年一度陪鴛侶  
清廟無才續舊詩

謁陵遊九龍池八首

渡石碕

驅馬渡南碕碕水清且駛蹠蹠未肯前磊磊青石子

問山下路

尋源悵何之渺渺入荒野裴回灌莽中偶爾遇樵者

谷口聞雞聲

隱隱谷窮處雞犬如隔塵下窺見牆屋知是五陵人

石田分浸

石田如畫局山溜細通塍點點鳧鷖白亭亭蒲稗青

九龍池

山脈貫龍腹山髓出龍口九道下成池千年漑靈囿

石壁

池東立石壁巉削不可捫頗疑天所造鬼斧尚留痕

池上峯

蒼然百丈峯峙此一池側遂令活水源長含太古色

飲龍口泉

軒此沆瀣汁清我塵土心臨流不能去山風振衣襟



成化戊戌四月十一日儲皇御左春坊敏政進  
講大學首章退宴文華門十二日上御經筵  
敏政進講中庸第二十章退宴左順門感  
愧之餘賦此呈同事諸君子

小臣蹤跡本疎慵  
袞職情知不易供  
才向儲闈傳大學  
又從宣室講中庸  
朝行輔德須耆俊  
家法崇文自祖宗  
尚食屢餐無寸補  
百年興運愧親逢

六月二十八日大雨赴齋所

黑雲連陣雨聲寒  
騎馬蕭蕭向掖垣  
平地急驚成海子  
御溝全似瀉河源  
擔夫沒屨猶探路  
從吏篝燈不到門  
小坐未眠聞屋漏  
旋移齋榻過前軒

二十九日夜晴太廟陪祀作時王惟臣詹事劉  
希賢汪伯諧二庶子鄭瑤夫羅明仲洗馬俱  
以疾在告

連朝陰雨一宵晴  
百辟相歡仰孝誠  
鶴馭自天來九廟  
袞衣成禮及三更  
迎鑾樂向門前奏  
扈蹕人從樹裏行

儲輔近來多病渴叨陪獨幸夜通名

七月十七夜病起露坐偶成

古檣搖影屋西山獨坐空階月上關遠杵數聲秋律應  
明星一點曙更閒道心儘可消官況酒力微堪慰病顏  
千里故園歸未得不禁征鴈遡風還

是日子賦此詩意  
勿勿不樂夜亦不

能寢後一日得家書知三弟不  
幸乃知骨肉至情相關如此

送程醫官詩

祈門程昂故韓府長史孔著之孫今河南大參用

元之子與予同出忠壯公譜雖疏而劣予為最長也昂幼讀書業舉而尤好醫遂被薦為其邑之醫學訓科蓋鄉人在京師者無不喜昂之克自立也昂將便道之河南省親而後歸其鄉過予言別時予方得用元書求記兩夫子之新祠因賦古詩二十六韻而并道之

當年傳韓王文行推爾祖近來佐雄藩老成羨而父之子當妙齡不與衆郎伍匪徒趨禮庭更喜遊藥圃時出

應人求沐箒多告愈一朝被掄薦千里來自府公試迴  
出羣官名入銓部青囊一編書居然襲簪組伏闕謝主  
恩奉檄返鄉土謂我亦宗丈朝來扣蓬戶自云將啓行  
艤櫂向河浦省親方就祿征途不為苦程本大族家南  
北舊通譜恭惟兩大賢家在鳴皋許寢堂聞漸衰眼底  
賸榛莽而翁竭行縣時能作祠主慷慨鳩衆工彷徨走  
丞簿輪奐一回新燕賀響鐘鼓頗欲得予銘盛事傳永  
古子行道祠下再拜奠觴脯油然慈孝心冥冥祝多祐

從來活人手亦足踵前武都門開祖筵薰風霽新雨視  
子真可人濯濯好眉宇勉哉亢其宗謹勿失繩矩餞行  
賦長詩為子一揮塵

送陸處士還太倉

處士太史  
鼎儀之父

老人住海上高隱不出門一朝念遊子乃駕北來轅南  
風吹塵淨忽忽止行軒遊子迎再拜喜極不可言是時  
子方貴執經奉儲垣朝回寡人事退食多公餐老人樂  
茲養心志靜不煩秋氣澹欲來中宵夢丘樊呼兒整歸

權回波浩澶澶逸駕既莫扳為壽奉酒尊頗聞老人語  
去住非所論願兒崇正學不愧宣公孫到家應幾時及  
此芳桂繁望望漁樵侶悠悠水雲村豈獨相勞苦而不  
知本原古來慈孝心坐使薄俗敦我歌送執事典型諒  
斯存

輓董尚矩編修父母

董氏寧都盛夫君說最良忽捐招隱操空貯活人方斷  
簡藏家塾殘碑立墓場由來天報德馳贈託名郎

提攜雙稚子孤月幾回秋  
綵服時經眼珠冠老上頭  
院松終抱節庭草詎忘憂  
太史應裁傳千年重女流

追和江東之學士留寓南京上新河徐氏園亭  
之作

留寓得林垆渾疑宿幔亭  
禽聲翻角徵山色中丹青  
雨竹驅塵淨風花又夢馨  
主人能解事終夕候文星

借住新河口雙扉逐岸垠  
水花堪索笑山果得嘗新  
暫謝催詩吏時迎載酒人  
乘涼多竹樹隨意脫簪紳



明月幾回團幽居體自寬綠醅時解困白苧晚生寒喚  
客彈碁子看人把釣竿年來通禁籍回首憶清歡

送祁門周仲實赴趙州學正

南風捲地吹沙塵落日東城辭故人來趨禮闈黃卷苦  
去主州學銅章新君家江南任河北浩氣稜稜面腴色  
登車不畏征途難問宿何須路人識趙州古多才傑士  
慷慨遺風尚何似春秋書法可與言即此上報明天子  
勸君卮酒贈君歌亨衢白日青雲多蘇湖遺教尚可復

功名老大非蹉跎

送張太史養正陞都憲巡撫宣府

北邊重鎮稱宣府一帶關河新蕃宇鎮朔長屯大將兵  
節制還應屬巡撫眼中之人今幾年受詔臨戎已三五  
聖明不喜文法吏特簡儒臣付斯土張君堂堂七尺軀  
生有奇才濟文武近侍初聯鳳閣班文章久擅雞林賈  
時從經幄講唐虞正色稜稜似文虎事功直欲追前賢  
螺贏雕蟲底須數人言國士可無雙書劍相傳自其祖

一朝果被九重知冠豸腰金佩長組想當跨馬出行邊  
先事澄清後戎伍千倉有蓄問陳紅百里相望看樓櫓  
守臣戍帥總郊迎幃首聯翮負前弩蒐田尚接金蓮川  
弦誦遙連赤城塢威聲早已罷烽燧號令誰能易旗鼓  
丈夫此行亦快哉好在邊人悉安堵愧予與君最相得  
半生不脫儒生腐置身豈合在公卿開口徒能論今古  
喜君大用夜忘寐恨不狂歌對雞舞平明載酒送君行  
祖席薰風動南浦願君當此得志秋莫學人嗟守邊苦

幕府重期老范謠家聲再續留侯譜功成復入漢庭來  
帝袞終須待君補

追和江翰長先生上新河徐氏園亭病寓之作  
徐家亭子楚江東蜀客來尋一逕通坐下清泉消溽暑  
門前喬木倚晴穹儘多醉興歸詩裏那復閒愁著病中  
更是可人翹首處鍾山如畫繞皇宮

送何惟一御史赴雲南按察副使

才騎驄馬隔春回又領除書遠赴臺萬里王程勞跋涉

十年交誼重裴徊  
即看憲府威聲起  
曾是詞林教養來  
後會有期君正健  
不將離恨薦離杯

會總菴和謝鳴治侍講乃叔寶慶太守君寄來

韻

半山喬木護空菴  
莫掃來頻尚有嵐  
諸謝家風今淞左  
老蘇亭子舊川南  
已應宗法千年立  
何止親情五世覃  
考室詩成想賢守  
幾回歌罷又開緘

題碧桃便面

省識霜春面何因出鏡中  
暗春吹不斷掌上舞回風

題張養正都憲小畫

柳岸頻收網魚租  
句納官晚來風浪急  
却在把篙難

送戶部趙祥主事奉使便道省其大母

重闈春寂永手教一孫成  
故里王程便新圖壽域  
明家人占鵲喜堂客羨  
烏情會取官綾誥馳封  
到祖名

戊戌清明謁陵宿齋所次韻江翰長

兩日向山行春深野望  
明寢園同駐馬陵樹不  
聞鶯寒

食驚時過清齋候禮成歸途應便好星斗夜縱橫

歸途次韻

謁陵歸尚早行李向來輕北闕看將近東方啓漸明群  
鴉驚客散一馬遡風鳴裊裊垂楊外新煙動夾城

送鄭洗馬赴南京太常少卿

法從年來屢奏功此行爭說薦書公舊都南北舟車便  
原廟春秋俎豆同喜奉慈顏開壽域却勞清夢繞儲宮  
重來未覺霜毛盛看續西京白虎通

早秋遊城南宗家園亭次韻周伯常中允二首

宗老當時喜種花至今池館壓堤沙蒼顏一去成塵土  
白日重來感歲華多謝諸公同駐馬却憐猶子解持家  
高城暮鼓催歸急不得臨風奠一瓜

惜惜殘暑逗輕紗馬入南園識舊家隣釀旋分燕市酒  
土宜時供歛州茶田苗有雨秋初熟林影無風晝不譁  
我已分為東道主請君隨賞四時花

送王廷貴祭酒先生考績還南京



高皇定都日首事在國庠青衿變左袵木主開中堂啓  
運今百載弦誦聲逾長先生晉陵彥手握司成章抗顏  
曾幾何述職來帝傍館閣多故人鬢髮驚蒼浪平生相  
慰藉講下無留良承恩復南轅頓首辭明光望望雞鳴  
山奎星夜垂芒願言崇令德舊輔登巖廊

晚香為太倉陸處士作

處士職方文  
量之叔父

篤行老不衰有美陸仲父平生得高趣卓爾在秋圃羣  
芳坐銷歇黃花正紛吐凜如千歲夫歲晚節逾苦窅窅

林亭間相對傲風雨慷慨陶徵君遺蹤未榛莽亦有韓  
相國功名照千古出處雖不同景行吾所取湯湯未流  
中誰能立孤柱千里聞德馨相思動吟塵

送日者方生還龍游

方生談祿命往往不受金謂是五行理豈易鉤其深我  
知據所得稍稍從規箴貴賤有天定中否非所任子術  
誠若斯子道良足欽曲學以阿世悠悠覺何心

題雜畫一

青山寂無人空陂澹流水垂楊不勝春  
搖搖蘸清泚

二

涼月滿荒原長空白露繁  
偶來疎柳下倚杖欲何言

三

落木凌秋下青山對面開  
澄江可消酒隨意放船來

四

夜下竹林灘水平船不動  
倚棹醉眠人襟懷浩難共

挽彭處士夫婦

國子監丞  
英之父母

隱君元是彭仙後一日凌風去不回寂寞王屯坡下路  
杖藜誰復聽松來

我愛梅邊最不羣每從先達訪遺文由來國子先生母  
却是梅邊嫡派分

擇繼當時屢問名邑南唐氏有家聲平生婦道堪書處  
請看彭門七弟兄

題梅贈山海蕭生赴山東秋試

孤芳自是不凡材顧影臨池首重回已報東歸消息好

春光隨馬過關來

送陳宏知事

風浪曾驚灑灑瀕堆憐君新手護高桅相逢話舊渾如夢  
已過年光二十回

烏帽西歸向我辭久來忘却贈行詩聞君歌罷還惆悵  
轉覺吟情媿往時


隨牒年來多苦辛青雲此日荷恩新南都列衛應相問  
知是尚書幕府人

蜀人陳宏舊從事于家君謹愿人也邇者赴官南京  
過予別且道往歲相從于峽中遇險事及誦予天順  
癸未贈渠之作蓋茫然不知其為誰我也語罷情不  
能已賦三絕以貽之

詹駕部天澤出知建昌便道省母得五字

采采碭中姬肅肅詹氏姥夫君久違榮家事獨攻苦裘  
登龜算七兒有鳳毛五一人迴超羣宦學邁其父誥錫  
盤龍書名屬司馬部謁分郡守符綰此建昌組仕途與

家便慈容喜先覩松陽歲將闌梅萼紛已吐畫堂開宿  
醞綵服動新舞遂哉忠孝心君恩子何補



篁墩文集卷六十六

欽定四庫全書

集部

篁墩文集卷六十七

詳校官編修臣李堯棟

中書臣劉源溥覆勘

總校官進士臣朱 鈐

校對官監丞臣張曾炳

謄錄監生臣王思溥



欽定四庫全書

篁墩文集卷六十七

明程敏政撰

詩

十月二十七日出都城

供奉金鑾十四霜寧親恩許暫還鄉花驄遠給從官殿  
寶鏹分頒出尚方行色漸驚殘臘到歡心那說畏途長  
篁墩宅畔寒梅樹定發新花候解裝

盧溝別諸親友

夕陽初下古城頭  
雪浪凝寒沸不流  
多謝同袍舊知己  
殷勤相送過盧溝

晚次良鄉

晚宿良鄉館  
離家第一程  
便應今日夢  
南北兩關情

早發

古城衰柳散朝鴉  
撫景全忘驛路賒  
山色西來寒潑黛  
日光東出暖蒸霞  
遠人僕僕行躔費  
一處搖搖酒幔斜  
此去前村知已近  
耳聞雞犬隔林譁

涿州道中錄野人語

良鄉  
役夫

我行范陽道水次遇老叟時當孟冬盡破褐露兩肘避  
逅一咨諏向我再三剖哭言水為沴天意苦難究今年  
六月間一日夜當丑山水從西來聲若萬雷吼水頭高  
十丈沒我堤上柳手指官路旁瓦礫半榛莽昔有十數  
家青帘市村酒人物與屋廬平明蕩無有水面沈沈來  
忽見鐵樞牖數日得傳聞水蝕紫荆口老稚隨波流積  
屍比山阜遠近皆湯湯昏墊弗可救如此數月餘乃可

辨疆畝下田盡沮洳高田剝稂莠農家一歲計不復望  
升斗官府當秋來催租不容後嗟嗟下小民命在令與  
守更有觀風使仰若大父母見此如不聞恐或坐其咎  
我民千餘人血首當道叩始獲免三分有若釋重負奈  
何急餘徵日日事鞭毆夫征又百出一一盡豪取悲哉  
一村中竄者已八九老夫家無妻一兒并一婦兩孫方  
提攜儘可慰衰朽豈期天不弔一旦遂窮疲一兒水中  
沒一婦嫁隣某兩孫鬻他人償官尚難勾老身自執役

有氣孰敢抖反羨死者安苦恨生多壽詔書開賑濟奉  
者有賢否終為吏所欺此食亦難就與其餒填壑不若  
舉身走一飽死即休寧復念丘首呼天一何高呼地一  
何厚我聞老叟言垂涕者良久恭惟天子聖化澤被寰  
囿聲色弗自御遊畋敢誰誘稼穡深所知真如古明后  
庶徵豈不諳一變故非偶無乃諸臯夔此責當敬受誰  
謂斯民痛不可事熇炎我亦食人祿深慚結朱綬豈無  
致澤心無地可藉手立馬野踟躕悲風動林藪

遇廣東守臣進鸚鵡

綠衣朱喙隴山禽，入貢新從廣海濤。  
輦致已聞經萬里，購求何說費千金。  
奉宸固表王人敬，却獻誰知主上心。  
不見韓公嗟二鳥，馬頭回看一長吟。

新城公館夜夢亡弟借邵文敬主事壁上留題

韻

弟兄無分過中年，千里雲山望眼穿。  
地下有時還見汝，人間無路可呼天。  
英魂彷彿歸何處，此夜分明到我邊。

公館北風吹夢醒不知衾枕已沈然

渡白溝

白溝東下水如襟不盡行人弔古心  
戍壘風雲流斷岸農家煙火半空林  
往來此日通燕粵興廢千年說宋金  
似有漁郎知此意擢歌聲入水雲深

雄縣城南潦水成湖渡二十餘里

雄縣城南初問津一片湖光青鏡勻  
櫓聲幽軋頗清耳帆尾招搖如喚人  
江南路景或轉徙冀北征夫多苦辛

扣舷笑欲問河伯海水桑田今幾春

晚行至任邱

任邱舊屬鄭州今廢止餘空城中有鄭市鎮扁鵲墓在道傍

風塵獵獵馬蹄翻旋覺殘陽下古原五里路中三渡水  
十家村裏九顏垣一杯尚指盧醫葬兩壘空餘鄭市存  
此夜客懷應漸好計程明日到鄉園

過石門橋舖

道上人稀日出遲繁裘風起不勝吹馬行冰地如臨鏡  
鴉啄霜田似閱碁野寺針時鐘隱隱誰家畊處塚累累



晨門一去無消息  
竚立河梁有所思

至河間之明日拜掃先世賜塋

勢擁長岡面四岑  
千章喬木藹成林  
幽堂結聚乘生氣  
天語昭回煥德音  
百世幸培先業厚  
一家難報主恩深  
敢將衣錦誇鄉里  
忠孝相傳本夙心

發河間出南門拜外祖林處士墓遂至舅家飲  
別

騎出瀛東門  
朔氣侵衣裳  
歸然外家塚  
枕此官道傍  
下

馬一頓首草木寒無光去塋數舉武升我舅氏堂舅年  
六十餘鬢髮驚蒼浪老妪悲且喜叩我家事詳賤子再  
拜言有親天一方晏歲東南征岐路多風霜憶昔四小  
甥玉立森成行豈期中道間少者多淪亡人生若電火  
展轉摧中腸矧茲遠行役聚散安可常但願母家好慶  
遠流彌長盡此酒一尊別淚紛瀼瀼去住兩凝睇古木  
留殘陽

途中寄別官主事廉

澗水潺潺似海流  
歲功那得半分收  
眼看餓殍盈官路  
手奉恩綸出帝州  
生意漸回千里望  
夙心應慰九重憂  
明年二月還過此  
擬有歡聲達冕旒

獻縣望河間獻王墓

呂嬴播虐燄天下  
無典籍楚賊嗣其兇  
掌故不能匿迨  
彼馬上公儒者  
猶失職更化凡幾年  
書禁始銷熄斯文  
天有意宗賢起  
王國開府兩河間  
恭文自天識憫茲簡  
冊灰訪購靡餘力  
遂令先王書次第  
乃有得緬懷仁義

風禮樂餘漢策高丘獻城東寒日下荆棘後生已千載  
私淑仰遺德

渡滹沱河

寒風挾霜起水浪從西來下觸斷橋柱碎此千瓊瑰流  
響甚清冽驚波屢盤洄官舟大如掌疾擢過南隈古來  
濟川人感激多良材

昇城晚遇南京戶部張彥質郎中附奏江南旱

災

詔使頻年發皇恩豈不覃水方滄冀北旱復苦江南天  
意嗟何極民生半不堪同袍夜相語祿食漫懷慚

昇城南門過御莊鋪乃劉豫始生之地

白草和煙覆矮牆一間茅屋野茫茫居人不唾劉郎僭  
猶把亭名號御莊

景州望董子祠

先哲巍巍老仲舒古祠猶枕舊園居一時仁義江都相  
百世淵源魯國儒稍慰夙心思莫水仰瞻遺像欲停車

後生碌碌成何用翹首風前思有餘

書所見十四韻

大水那能望有年恤民恩詔喜拳拳事憑公廩終難濟

情到官莊最可憐

河間一府官莊共一百三十餘處少者三五百頃多者千餘頃甚至有跨

縣者占取膏腴多極萬索來金穀動盈千稅於子粒偏加

重

公田畝起科多至三升官莊畝起子粒三斗

賦入荒年亦未蠲

今歲凡被災之處或

免三五分或免七八分或全免惟官莊畝科銀一錢二分

港次半收煙火價

凡近莊蘆葦場

不許人樵樵者皆先納煙火錢方許

野中分握草場權

凡近莊草地有官馬入其域不論干

百數悉拘之每馬料  
銅錢三十文始釋

雞豚已盡田間利

凡官莊納子粒  
時二項附納一

豬一頃附納一羊或  
一鵝二十畝納一雞

舟楫仍需水面錢

近官莊地被水  
沒者往來必須

舟渡每舟月科銀三錢謂之水面錢  
其田在官河兩岸者亦終歲科此錢

泛使不禁頻去住

莊主每歲四季遣人徵子粒諸色其家臣八人率游手  
六七輩直入官府呼叱守令日需下程雞酒魚麵諸物  
官府不能詰  
小民何日許安便伐殘桑棗惟餘地典盡車牛

莫訴天

今歲大水桑棗多死者因伐以償官莊  
地中寸草不生車牛俱賤折售于官莊

罪繫便

連兒女輩

每子粒不數莊主即遣人拘囚民間子  
女有捶死者有因而汗之者其苦最甚

鞭笞

寧計令丞員

獻縣令被莊主笞四十幾  
死子過其境猶曳杖來迎

屋廬毀廢淪波

底

自雒縣以南幾千里不復成村十室所存惟一二類垣

老弱流離委道邊糠粃

無端爭入市

河間一帶市中賣糠及哇哇者取豕食和水而取其汁以食人

酒漿那復

敢開廛

河間以南村中不復有酒家

監門有淚揮圖上守土何人達

帝前愧我身非觀察使傷心聊述紀行篇

日出入行

朝看紅雲出東海暮看紅日沈山西沈東出不自已  
行人到此傷心顏家居微歛間身綴蓬萊班南親闈兮  
北帝闕古來忠孝兩難盡此途此去終來還仰天戴日



歌一曲不覺清淚流潸潸

過永昌橋野老云太宗靖難過橋以舊名晉起  
不雅特更今名

界石巍巍表縣封永昌橋上午陰濃漁郎不復歌前代  
野老猶能說太宗幾里護村堤似玦大河分派水如龍  
臨風不覺徘徊久極目高唐已暮鍾

過南鎮店二首

陰靄如滋穉麥野風時振枯桑午市方趨南店早行已

屆東昌

林外依依煙火道中輓輓車聲廢碣猶傳蒙古短亭正  
及荏平

荏平道中

落日荏平道孤村未掩關望中青隱隱人說是陶山

入東平山中古墳以百十數殘碑斷磔多有年

月可識

山過東阿兩路分草中無限昔人墳等閒却忘征驂苦

貪看殘碑到夕曛

東阿王

我愛東阿王翩翩貴公子雖讀萬卷書日日弄文史已  
乖弟兄好更遂君臣理盜漢者何人胡不相諫止所以  
大道行重義不重死淒涼豆萁詠掩卷吾不齒當年開  
國地寂寞小山趾諒哉朱昱心千載有餘恥

梁顥墓

顥年四十餘登第官至秘書卒年五十餘子固亦

登第為執政官名載宋史而當時好事者傳其八  
十二舉狀元至其子孫亦無知者詩以訂之

四十登科五十七史書猶載秘書梁誰將鶴髮欺公道  
遂使龍頭失故常世俗固應多信耳子孫何得誤傳芳  
有靈地下還知此獨對泉臺笑幾場

汶上

家家文石甃街渠盡是頻年伐塚餘所獲自收金玉外  
不知曾見殉書無

夜次兗州寄安邱王府教授鄒鈍夫

半生交契說鄒陽年少才名獨擅場  
誰意兔園今白首  
只將詞賦動梁王

寄衍聖公

闕里巍巍入望中後生山仰意何窮  
文光遠燭奎星上  
聖澤長隨泗水東崇德已隆昭代禮象賢當有素王風  
十年濫接葭莩契寸札殷勤託便鴻

兗州東南望孔林居人謂之夫子塚云在九龍

山下其山九峯故名

闕里何年到匆匆一望間人言夫子塚正在九龍山

嶧山歌

行人朝行嶧山下山色凌寒翠堪把秀峯斗絕倚穹霄  
復嶺蜿蜒走平野路傍岩石亦嶮巖上似熊羆下牛馬  
征夫為我一一言數十殘碑尚堪打不知何代帝王來  
馳道猶存古磚瓦靈湫一眼透山巔時有風雷起長夏  
土老能占絮帽雲刻日甘霖應時灑於中勝境難具論

洞府多藏石尊尊入眼方知造化工披圖始覺丹青假  
蹇予素乏塵中緣最是平生愛山者驅馳未暇一登臨  
浩蕩襟懷向誰瀉思將短曲慰山靈安得長才繼騷雅

鄒縣城南拜亞聖祠下

萬年文運若循環此道誰堪繼孔顏但使七篇當世用  
便應三代舊風還子孫故里題鄒國俎豆嚴祠對嶧山  
下馬望塵修敬處夕陽川上水潺潺

憩滕南郵亭

家山疑在望中青  
征馬蕭蕭此暫停  
屈指過江南北路  
還過百二短長亭

九日怨十章

亡弟克寬始生日在歲之重九  
自號稔菊每自江南赴北京  
秋試弗利輒過是日乃告歸  
滕縣道中馬上忽忽念此殆  
不能為懷因集古詩十絕題曰  
九日怨用以泄予之哀思焉

黃花半老清霜後  
憶弟看雲白晝眠  
妙質不為平世得



悠悠生死別經年

滿城風雨近重陽  
馬上誰家白面郎  
時復看雲淚霑臆  
寒花猶作去年香

懷抱何時得好開  
陶然共醉菊花杯  
一行書寄千行淚  
竹死桐枯鳳不來

惠連羣從總能詩  
一夜霜風凋玉芝  
叢菊兩開他日淚  
欲懽無復似當時

此身那得更無家  
節及登高忽嘆嗟  
人面不知何處去

一年容易即黃花

南菊再逢人卧病浮雲世事欲如何  
哀歌未斷城鴉起  
鴻鴈不來風雨多

物色生態能幾時  
九日尊前有所思  
遙知兄弟登高處  
此恨綿綿無絕期

愛而不見心斷絕  
瘦馬獨吟真可哀  
寄與風光共流轉  
菊花從此不須開

與君今世為兄弟  
未必秋香一夜衰  
古往今來只如此

九重泉路盡交期

遍插茱萸少一人  
蒼苔白石已成塵  
人生在世長如客  
更結來生未了因

彭城廢縣南謁漢高祖廟

古原荒樹倚村斜  
高廟威靈亦可嗟  
警蹕千年餘塑馬  
鏡簫終夕舞神鴉  
碭山落日銷雲氣  
睢水寒風捲岸沙  
漢楚興亡那復問  
一龕燈火屬僧家

徐州望子房山山上有祠

子房祠在望中岑蔓草寒煙尚可尋  
五世報韓終有恨一時興漢本無心  
書傳黃石知真假名配青山自古今  
立馬斜陽無限思天教風壑助豪吟

徐州驛舍竹林可愛

徐州驛裏蕭蕭竹好手應難入畫圖  
北客南來初見此不勝清思繞江湖

不寐

千載逍遙堂獨卧愁不語北風吹竹林  
一夜響寒雨

徐王墳

兆域巍巍近鳳陽萬年坤德此開祥當時不是靈源厚  
異姓誰封一字王

夾溝山中夜行

馬渡夾溝東溪橋卧斷虹夜闌群動息月出四山空物  
色歸塵外天形入鏡中茲遊奇絕甚琢句恨難工

同年范嘉龍御史於大店驛相候叙話良久乃

別

浮生聚散若飛蓬驛舍那知此會同可是故人非白眼  
獨勞前路駐青驄雲回峻嶺朝含日霜入疎林夜戰風  
近事忽忽談不盡出門車馬又西東

固鎮驛早發集古二首

中夜起坐萬感集有時顛倒著衣裳病身最覺風露冷  
離思杳如關塞長

正睡夢中行十里東方明星亦不遲但見烏帽出復沒  
馬首東來知是誰

渡淮次濠梁

萬里無風起片雲  
中流一綠浩沄沄  
源從桐栢山中瀉  
路自濠梁驛下分  
賈客帆檣依岸宿  
皇陵鐘磬隔城聞  
逢人欲問觀魚樂  
莊子臺前又夕曛

中都形勝

境當南北建中都  
形勝遙應古亦無  
四望河山圍太寢  
仰知天地肇皇圖  
復田萬世還過漢  
開國元年尚紀吳  
立馬臨淮城下路  
五雲回首欲嵩呼

鳳陽南二十里陟小嶺望見環滁諸山

一時飛思薄青冥水墨圖開萬里屏若個溪山幽絕處  
釀泉聲繞醉翁亭

沙磧鋪山行

獵獵寒風吹日黃山中隨處磧聲長不知早稻皆成草  
猶自涓涓下野塘

鳳陽南行失道誤趨定遠

自我為近臣塊坐今幾春出門將何之引躅隨他人南



行二十日但喜郵亭勻渡淮宿濠梁疊疊夜問津曉入  
定遠山四顧驚荒榛人言此道非迂遠難具陳跋馬重  
嘆息寒日吹沙塵古來賢達士岐路多霑巾安得指南  
車慰此長途身

池河驛山行二首

隔宿風銷野際登時日出林端牛羊自占坡暖鷺鴨不  
知水寒

古寺火燒梵塔空壇水沒田塍行人時復駐馬野老適

來負薪

途次偶成

寸寸田塍接磽阿一叢茅屋枕坡陀  
馬蹄已近江南路  
漸覺人家水竹多

大鎗嶺

四顧峯巒劍戟攢丹梯百折暗中盤  
凝眸叵測東西闊  
仰面惟愁上下難  
土著已諳猶足弱  
客遊雖壯亦心寒  
我來疑是茲山幸  
欲寫微名石上刊

晚過大柳樹驛

南京三衛  
丹峙山中

大鎗嶺下馬頻揮大柳岡頭客漸稀  
烈火燎原虓虎避疾風驚草雉雞飛  
山迴轉覺郵亭遠月下先愁驛路微  
野戍誰家多種竹旅懷當此更依依

月夜渡清流關

壁立萬仞清流山橫截萬古清流關  
人間險固不可少老天生此青孱顏  
平生細讀五朝史柴郎亦是奇男子  
斬關縛取二將軍點檢真人入驅使  
我來弔古當窮冬

陰崖草木號天風當時戰處杳無跡惟有明月留山中  
聖代車書會同久此地無勞置官守長歌一曲下關來  
夜市還沽釀泉酒

次滁陽贈州守劉煥

瑯琊山水聲長六一堂前草樹荒駐馬喜逢劉郡守  
風流猶解說歐陽

早發滁陽戲題

夜到滁陽只困眠去時纔及五更天匆匆諭德人應笑

何不來嘗庶子泉

過家君舊任太僕所居聞當時及門者惟典術

魏延一人

行雲落日繞鄉園  
廢馬如龍草自蕃  
聞說舊時門下客  
蕭條惟有魏生存

望瑯琊諸山不及遊  
典術魏延追及誦  
吾同年  
莊孔陽司副四十年來方一到之句不覺笑  
曰孔陽謝病居江浦去滌不百里而近尚半

世一至况碌碌我輩乎馬上次韻一首以示延  
便中寄聲孔陽未必不為之撫掌也

林壑分明自一寰  
釀泉聲出兩峯間  
百年紙上看陳迹  
寸日忙中負此山  
到處僧為風月主  
生來誰似水雲閒  
逃名更笑莊周懶  
半世方成一往還

和州香淋寺浴湯泉

山根流出暖湯湯  
暗處斜分到石堂  
千里風塵消半霎  
一團和氣靄中央  
何年混沌初開竅  
此地溫柔別是鄉

浴罷不知將夜半老僧頻換佛前香

渡江次采石

二十年來塵鞅中臨江喜遇快哉風  
六朝隱隱寒山翠萬里沈沈夕照紅  
絕海舟航南北共兼天波浪古今雄  
擬沽采石磯頭酒澆我平生磊砢胸

李白墓

誰見吟魂月裏歸臨風懷古思依依  
史中出處猶真偽地下形骸果是非  
采石人家空奠酒盛唐詩派不傳衣

騎鯨浩氣今安在，一片江流蕩落暉。

冬至行慶賀禮于太平府中

一線陽隨夜氣生，瞻天隨例拜江城。  
不知此際文華殿，誰導青宮鶴駕行。

黃池

黃池鎮下曉揚舲，扶上肩輿尚見星。  
草結鮮紅鷓眼粟，竹搖蒼翠鳳尻翎。  
人家愈覺園林密，郵舍初分道里停。  
已過江南三百里，鄉音入耳漸中聽。



太平山行

江南風土最怡情  
臨水人家分外清  
輕櫂野航如使馬  
密栽高竹似連城  
好山隔岸開真畫  
絕澗流泉奏古笙  
北去定應勞夢想  
題詩留與白鷗盟

敬亭山

青山一萬仞  
我愛敬亭名  
勝槩一千里  
分疆及數城  
不夸遊目騁  
轉覺道心生  
李白題詩在  
風流續未成

宿宛陵書院

自從刪述來詩道幾更變騷些無遺聲漢魏起羣彥謝  
絕及宋沈入眼已蔥蒨頽波日東馳李杜出而殿當時  
多渾成豈必事精鍊云胡倡唐音趨者若郵傳坐令詩  
道衰花月動相眩千載宛陵翁惟我獨歆羨翁詞最古  
雅翁才亦豐瞻一代吟壇中張主力不勸遂使天地間  
留此中興卷如何近代子落落寡稱善紛紜較唐宋甄  
取失良賤無乃久浸淫曾靡得真見渺渺歲將夕南來  
宛陵縣頓首升翁堂松竹猶眷眷感慨撫陳跡江水一

再奠我心夙景仰我學誠襍線上想三百篇斯境復誰  
薦

寧國縣道中

宣歙巍巍接縣封忽驚身世得奇逢高懸石棧三千丈  
四合雲峯百萬重野廟鬼神疑作怪水田蛇虎動留蹤  
人言此去仍多景自保看山力未慵

早發湖樂鎮過黃木嶺遇佐時及鄉人來迎

湖樂鎮下更未闌黃木嶺頭山火寒峯腰霜滿一尺徑

磧底風生千仞灘歸心急喜到家好側足方知行路難  
前途忽與故人接相對不覺成悲懽

過叢山關入績溪界巧溪橋

江南江北路迢迢馬上朱顏漸覺凋今日故鄉初入眼  
叢山關下巧溪橋

十里巖

不知何代起神雷鑿此雙峯壓路開數點落星浮水次  
一灣晴雪灑岩隈詞人試險身全汗劍客臨風志未灰

我欲深鑿崖石上改封君作大飛來

至家

終日思歸今始歸故人喬木尚依依庭闈喜極翻成泣  
手足情深事已非良夜却虛姜氏被半生長負老萊衣  
愁來便欲求終養恩詔丁寧未敢違

謁先塋于水橋干

松蘿山色蕩朝暉先龍依然樹一圍累葉相承支系在  
百年今見眇孫歸堅珉近勒尚書表故篋猶傳相國衣

我願宗人勤種德幾家文獻重南徽

哭亡弟克寬于南山堂僧舍

寸心如折淚如麻恨殺鷓鴣原日易斜黃卷有期承世業  
朱顏無分樂年華佛前已悟身為幻夢裏長驚目是花  
千里遠來多為汝有靈今夕定還家

汪王廟

王諱華隋末保據歛宣杭睦饒婺六州  
稱吳王唐初內附封越國公土人德其

全郡之功廟食  
至今子孫最盛

聞說真人起晉陽六州圖籍便歸唐干戈竟免群生難

簪笏宜傳百世芳封誥尚存題越國史書全失紀吳王  
叢祠香火年年盛知是英魂戀故鄉

### 五顯廟

五嶺巍巍奠一州炳靈寧不異長流火旗雲馬分明見  
風魃山魃次第收滿坐遺形如伯仲當時封爵比公侯  
神功最是難忘處歲歲居民慶有秋

拜先世祖陳將軍忠壯公廟于篁墩

公諱靈洗  
以布衣起

兵禦倭景保全鄉州  
謚忠壯公廟在祀典

借侯東下勢難支出處如公最有辭忍見松楸汙賊手  
徑提戈甲濟王師兩朝勲德收前史一郡蒸嘗奉古祠  
再拜遺容風動幕凜然猶是起兵時

拜先世祖晉新安太守府君墓于雙石

府君諱元譚以

循吏賜第新安新安之程皆其後事具方虛谷碑

南朝遺跡半無聞我郡猶傳刺史君當日循良開甲第  
至今行旅識荒墳百年守令孤芳在萬指兒孫一派分  
不見墓田雙石礫白楊寒雨晚紛紛



紫陽書院

專祠文公鄉賢祔食  
院額宋理宗親書

千載山堂倚故墟  
兒童能識紫陽朱  
鄉賢依附襟裾末  
縣令周旋俎豆餘  
恩典近延徽國譜  
奎文猶刻理宗書  
平生學道全無似  
九拜趨庭愧小儒

拜先世族祖宋丞相文清公元鳳祠宇墓于古

城關積慶寺

石獸行行草樹間  
往來人說古城關  
先靈幸託青蓮宇  
上相曾分玉筍班  
一族再分昭穆序  
百年初識祖宗顏

非才豈足光潛德負此穹碑勒墓山

祠墓碑文  
予所製也

臘月半後祠堂前并後園梅花盛開敬次家君

卷中舊韻二首柬克儉

年來空對寫生堂的見冰容自不常疎影似龍清戰月  
貞心如鐵冷欺霜祇知葦竹堪為友轉覺凡花不是香  
風味獨當充鼎實肯隨脂粉媚含章

亭亭玉立晚風前春意終歸雪意先後院根如前院好  
南枝花比北枝妍邊城舊曲吹山月姑射新妝照水天

明發定應勞夢想乞將消息往來傳

先忠烈王遺蹟十二詠

王諱靈洗徽之休寧人當梁末以布衣起義兵禦  
侯景之亂州郡獲全後為大將屢立戰功封重安  
縣公以卒贈鎮西將軍開府儀同三司謚忠壯生  
子二十二人其肩愈盛凡徽之程皆祖之而土人  
德王之功者因相與廟祀至今宋號其額曰世忠  
累封廣烈孚佑顯應忠惠侯加封忠烈顯惠靈順

善應公元時再拜進王封本朝載在祀典出處之  
詳具于史傳然其遺蹟在鄉郡最多而散出無紀  
敏政輒收萃之以便子孫觀覽其所未知者尚俟  
他日追補焉

射蜃湖

公所居在篁墩湖側湖之神嘗夢見于  
公曰呂湖蜃將恣陷篁墩諸村明當與

之決戰披白于肩者我也敢求助于公明日  
公俟于湖上頃之霧晦水聲洶洶兩牛角于  
湖上而肩白者屈公一矢中其黑者已而晴  
明湖水皆赤不踰夕有黑蜃斃于吉陽灘下

青草湖陰路神人跡尚留雕翎方出殼蜃氣不成樓閣

石灘聲急連村樹色稠英魂知不散時向此中遊

白石阡

公射蜃後有黃冠叩門曰感公厚德無以為報引公至黃牢山下以白石

志之曰遠此可暴貴也言訖不見公奉母夫人葬焉

湖上妖氛滅山前吉兆開黃冠離水府白石定泉臺墓碣龜仍在冥儀獸半推年年寒食雨時見遠孫來

相公木

射蜃湖中有巨木相傳為射蜃時所立棚木也更代猶存漁者觸之必有

禍號曰相公木以公為開府儀同三司故云

棚木長千尺蜿蜒距水涯皺皮躔荇帶老色映蘋花雷

雨春驚蟄星河夜汎槎漁舸莫輕近神物此為家

鼓吹臺

公起鄉兵拒侯景時嘗率諸少年習戰湖上傳聞風雨之夕猶有鼓吹聲

壯士昔登臺鄉兵取次裁鳴輦催陣起吹角名軍回舊  
事傳遺老荒臺沒草萊至今風雨夕猶訝戰聲來

鐮卜橋

公破賊後散兵于農方自負鐮入田而朝命適至公倉皇以鐮置水中卜

休咎得吉卜

馬橋因以名

荷鋤方出郭徵詔忽臨身問吉占田具祈靈拜水神風  
雲曾得意溪壑自生春竚立長橋下悠悠跡未陳

洗馬池

公與侯景別將戰後洗馬于此

山前收戰後洗馬向晴波  
髀肉加鞭久腰痕受箭多  
敵兵愁棄甲征戍喜投戈  
舊蹟無尋處沙頭剩綠莎

射的山

公將兵過旌德抽矢射山誓平侯景故名

空山崖石上羽鏃半留形  
鳥過不敢下苔封疑有靈  
子孫傳野史守令刻新銘  
亦有南開府忠勲繼汗青

歃血臺

公與諸將討侯景會盟于此

勤王初受命仗劍即登壇  
左袒人爭奮中興事不難  
令

嚴朱雀幟盟重白雞盤想像臨戎處荒山草木寒

相公湖

公故宅盡為湖時有巨魚出没人不敢取天氣清晏時見宮室其下

將軍本龍種居處化淵中變態時常見真游路不通渚  
宮隨燭顯海市向陽空不是多遺愛人爭說相公

千年木

公自營兆域祝曰子孫能大吾門當生大木既而生楮木一株大且十圍

後為風雨所偃旁出二枝宋時猶合抱云

嘉木何年種寵從護古墳蛇皮斜溜雨龍角上排雲手  
植傳鄉土神遊隔世氛子孫今萬派冠珮日紛紛



相公壇

公薨後土人於千年木下為壇奉祀以社公配焉

結壇嘉樹下村賽鼓逢逢老穉冠裳雜雞豚俎豆豐靈  
旗朝送雨神馬夜嘶風自是陰功厚年年配社公

世忠廟

宋時鄉人以公靈應請立廟朝議以公為趙忠臣嬰之裔元累封忠烈王

本朝載在祀典

立孤人去遠孫子更流芳忠節高千古神功被一方舊  
祠傳異代新爵換真王何幸南歸便焚香拜寢堂

東密巖乃先世祖都使公濬淘兄弟起兵拒黃

巢處

萬仞巉巖百里長此中曾蹶草頭黃衣冠稅駕趨行在  
兄弟登壇守故鄉一代風塵山戍遠千家煙火石臺荒  
水田折戟時常露知是先人舊戰場

齊雲巖

上有玄武觀

四山回合杳難窮翠錦屏開面面工巨石穿雲成戶牖  
半崖飛雨作簾櫳地靈今古神先據境隔仙凡路可通  
極目丹邱何處是巍巍樓閣起天中

何年絳節此中停  
五老依然護紫庭  
鐘鼓分頭雙岫碧  
香爐當面一峯青  
匡廬未敢爭誰秀  
玄武應知不自靈  
勝覽日斜歸未得  
細磨蒼蘚讀碑銘

古城巖

乘閒來上古城巖  
石洞深深似隔凡  
疊巘每迎神馭下  
危峯疑出鬼工劊  
一溪寒水圍青嶂  
萬壑天風響翠杉  
知是何人先到此  
斷崖高處刻題銜

次宋縣令鄒補之巖口石壁留題之作

不見當年舊縣基，獨留孤廟想陳隋。  
水過山脚無尋處，路繞雲根有斷時。  
雉堞草荒埋廢礎，鷺峯苔老剝殘碑。  
危闌却倚青冥望，入眼分明自有詩。

松蘿山

雙峽中分一徑通，寶坊遙隔片雲東。  
四時山色涵空翠，萬折泉聲瀉斷虹。  
清愛竹孫穿凍雪，靜聞松子落香風。  
登高兩屐吾方健，攜手無因得贄公。

斷石村

大星何日墜滄浪點破風前一鏡光野擢偶來幽磎側  
古詩誰刻斷崖傍丹梯恐躡蒼苔滑雲碓時春白稻香  
西望欲窮山盡處石人峯倚暮天長

飲楊浚明推府宅夜歸宿城隍道院

醉投琳館一燈殘葉上蕭蕭雨未乾乍入故鄉翻似客  
倘成新社即辭官好山有約遊方健勝地無塵夢亦安  
半夜涼風吹酒醒恨無竒句寫琅玕

篁墩文集卷六十七

欽定四庫全書

篁墩文集卷六十八

明 程敏政 撰

詩

二月一日辭親赴京出休寧東門

賤子來何時  
條馬戒晨裝  
王程難久滯  
俛首辭高堂  
哽咽不敢啼  
懼我親情傷  
躑躅縣東門  
涕下霑衣裳  
回思古之人  
仕者不出鄉  
自從封建廢  
坐使親義戕  
我生竟何成  
去住心徬徨  
春陰澹如染  
遙山鬱相望  
願保忠孝

期桑梓生輝光

道中與敏德弟聯句

故鄉山水忍相違

董墩

聚首無端又北歸一路春風梅

正發

敏德

幾家冬雨麥初肥杯盤祖席離情苦

董墩

車

馬長亭曙色微主上只今求道切

敏德

敢將忠孝負庭

闈

董墩

漁梁壩登舟至浦口初聞雷餞者相賀

路當歛縣境水是淞江源竹樹知誰氏風光似故園峯



頭嵐翠合石齒浪花翻舉櫂聞雷處嘉禎感贈言

夜宿綿溪

屈指離家又一程蓬窓歌枕夢難成無端水郭停舟處  
半夜灘聲似雨聲

過乳灘

灘左一石臨溪高三丈石上青松一株  
灘右瀑布一條自石壁凡三折飛墮溪

中

一櫂迎風下乳灘推篷忽得兩竒觀高崖瀑水淙聲遠  
盤石孤松墮影寒仙境恨無同志賞塵冠思向此中彈

他時夢想勞題句不用千金買畫看

宿河上嶺入夜風雨大作

辭家已三日夜泊蒼山磯遙看月仰瓦星斗何依稀玄  
雲忽四合黯爾燈無輝孤眠覺有異起坐披裳衣長風  
挾雷雷雨若天瓢揮萬響凜不測勢恐孤蓬飛船頭屢  
低昂知是江波肥移牀避罇漏客心轉淒危古云行路  
難此語良不非悄然百憂集君父難兩違裁詩記所遭  
胡寧不懷歸

淳安道中用漁梁壩韻

有梓桐源及響山

桐梓何年盛谿頭尚有源  
疎梅臨竹岸細麥擁茶園  
興薄飛鴉去閒便浴鷺  
翻舟師能指點空谷應人言

嚴州道中情思頗適

山遠沙平水似煙  
蓬窓贏得枕書眠  
暖風一日初黃柳  
好雨連宵賸綠田  
傍岸鳧鷖如送客  
隨家鷄犬不驚船  
相看便有江湖戀  
耕鑿娛親在幾年

雨中過嚴州與張時禎通判同年叙別

石梯如畫帶江樓喜遇看花舊俊游十四年來情不盡  
東風吹雨上官舟

嚴州東下兩山高崖瀑布以百十數

東崖瀑布如玉龍西崖瀑布如白虹千尋之勢不可殺  
交飛亂落清泠中小聲萬騎驅元戎大聲五夜鞭雷公  
初疑武丁舉斧開崆峒石髓流出青山空又疑海若上  
借愁天工鬼窟遂與銀河道北舟直下桐川東一江春  
水搖春風推蓬左右忽見此頓清百歲塵埃冒跡愧莊

生為世寵才非李白憂詩窮一盃酌水一自酌安得凌  
虛浩然與爾爭豪雄

釣臺

暫擲綸竿去復還徵書空照水雲間桐江巖壑知心久  
肯遣移文過北山

過姚文敏公墓

三朝勲業重姚崇最與家君契誼同帝里風煙留故宅  
仙鄉山水見幽宮兩家莫報君恩厚百世應存士論公

我忝禮闈門下客不勝清淚落東風

登富春山時鄉族商人多以索逋錢寓子陵祠

問其所從索者皆縣官也笑賦一絕

爭道先生百世師富春山麓起崇祠殘碑尚刻希文記  
終有廉貪立懦時

夜穿杭城宿吳山驛明日三司故人固請遊西

湖又明日遂拜岳王墳飲淨慈寺時顧天

錫郎中以公事寓杭不及預會

匆匆行李夜穿城  
好友來尋半日盟  
峯頂幾多僧錫住  
湖心無數酒船行  
風來廢苑堪懷古  
雨蝕殘碑不記名  
入眼淨慈還數里  
望塵先拜岳家塋

湖上東風水似苔  
羣公相約看山來  
午鐘殷殷穿低樹  
春宴紛紛集寶臺  
千里暫教塵夢醒  
一尊思待故人開  
興酣更欲尋龍井  
誰有風流續辯才

錢唐雜詠四首

水色山光似昔時  
往來還動百年思  
顛崖蘚蝕錢王箭

拍岸潮迎伍相祠，歲月難勝雙短鬢。  
興亡能博幾新詩，望中喜是林逋宅。  
竹外梅花一兩枝。

康王疋馬渡江時，北望誰能有所思。  
洛社末由恢土宇，臨安何忍奉郊祠。  
兩朝和議愁通表，一卷褒忠漫有詩。  
只賴皇天知此意，墓林長聳向南枝。

徙倚湖山欲暮時，行人隨處動遐思。  
張王僭竊今無地，白傅風流尚有祠。  
夜靜六橋誰放鶴，春回三竺好題詩。  
蓬牕預買仁和酒，卧聽舟人唱竹枝。



繁華欲賦太平時，慚愧無才續左思。  
曉市船趨三汊港，春遊人集兩峯祠。  
樓臺不類人間世，風月都成畫裏詩。  
東望綵雲懷帝闕，暘烏初上海桑枝。

岳王墓再賦一首

南渡宗賢力相秦，不辭降表便稱臣。  
青衣空作還家夢，金字頻追出塞人。  
亂國已遭三寸舌，封王何益九原身。  
漁郎似識英雄恨，日對孤墳理釣綸。

臯亭山

曉受降書夜戢兵  
路人猶說伯顏名  
中原多少奇男子

不向燕山立漢旌

按伯顏應改巴延  
同韻語故從原文

道中六言

臯亭山前竹舖臨  
平鎮下桑園北岸  
方收纜索東風忽  
動檣幡

調巡撫宣府張養正都憲

烽火中宵澈塞明  
曉提精騎出嚴城  
黃雲白草劉家砦  
從此邊人不敢行

過桐鄉晚宿皂林驛

東風吹日半晴陰不覺船窓水氣侵  
三里人家春淡淡  
一江煙樹晚沉沉

望後舟

予自錢塘望後舟不至沿路候之抵皂林乃克會  
因思古樂府有望後舟之名漫賦一首

前舟已過青山趾後舟猶駐滄江涘  
得風未可遽凌人  
同在江湖作舟子欲去不去心茫然  
耳畔彷彿聞鳴舷

須臾相見謝相候並行不礙波中天君不見前舟獨行  
方坐嘯後舟向晚終須到又不見後舟載比前舟輕反  
過前舟三日程活計平生繫征舸但願風潮共安妥不  
惜朝朝望後舟他人豈必相忘我

嘉興拜先師呂文懿公冢以陳無已丘園無起  
日江漢有東流詩韻敬賦十首

隔地三十里違顏十八秋悠悠生死恨今日過林丘  
先皇臨御日夫子最蒙恩共說青山下雙麟表墓園

已別門牆久猶能識舊奴遺書三萬軸還似舊時無  
鶴髮太夫人見我動容喜再拜升高堂懷賢不能起  
夫子雖云亡未絕詞垣筆尚有代言書昭昭比星日  
一代呂家府風流重此邦重来還記取雙戶對寒江  
之子讀遺經青年盛文翰皦皦丹鳳雛居然立霄漢  
夫子本清白芳名亦難朽豈無富貴家灰飛竟何有  
濫逐門生後何才輔兩宮百年含愧處此道不曾東  
一瓣香難致官亭促去舟船意應作夢清淚早先流

過太湖追和宋蘇舜欽韻

萬古淵源直到今，征帆如葉望中深。  
天留白塔分平野，雲擁青山入太陰。  
江勢西來寒匪玉，日華東出暖浮金。  
蘇郎死後閒風月，吳下何人續勝吟。

李貞外應禎吳太史原博約遊虎丘

日散林霏見虎丘，故人清約此閒遊。  
望深綠樹知藏寺，吟遍青山始繫舟。  
塔院風來花似雪，劔池春到水如油。  
酒闌不盡吳中勝，老衲相招更倚樓。

虎丘之遊沈啓南在坐作畫一幅再賦一首

蒼崖題字半留痕  
笑倚東風酌一尊  
寺主繞山開竹牖  
園丁隨路作花村  
聽經石古苔生繡  
莖劔池深水不渾  
入眼有詩吟未得  
天機都屬隱侯孫

雨中次無錫寄秦廷韶太守

南來欲試惠山泉  
春雨橫江懶繫船  
咫尺故人難晤語  
相思時誦竹鱸篇

寄華守正

百里江鄉石路斜，東風相隔渺天涯。  
離人十載今何似，無限情懸孝子家。

秦廷韶太守及九龍山樵陸懋成請遊惠山遂  
酌第二泉飲聽松菴次少師姚廣孝留題舊  
韻一首

江雨吹風過山門，向晚開汲瓶分水去騎馬聽松來老  
鶴驚人起新篁夾路栽，多君憐別意隨處送春杯。

留題聽松菴次廷韶韻



一菴門對老松開，鎮日風傳萬壑哀。  
古井暗泉寒瀉玉，長廊陰雨滑生苔。  
鐘聲忽自山中出人影，遙從樹杪來。  
未濯塵纓還自笑，籬根蒼犬合驚猜。

寄鄒鏞

尚書幕下總能文，曾說鄒陽最出羣。  
此日相思空倚櫂，暮天寥落見行雲。

遊惠山與廷韶賦詩看懋成作畫不覺至暮相  
別未數里風雨大作竟悞一程船窓燈下漫

賦一律奉寄二君子

笑坐泉亭汲水嘗偶然行樂便相忘南來漸有江山癖  
北去那憂歲月長好景正堪增卷畫短吟猶未病奚囊  
早知風雨春江暮悔不隨緣宿上方

常州飲廉伯家

舟到毘陵晚不移相留曾是十年期坐間總說江南樂  
別後應懸冀北思夜酌不知更已換春城偏與月相宜  
歸來忽記豪吟處稍覺閒情似往時

謁京口魏勝將軍廟

長風吹山礮落日下京口桓桓魏將軍廟食此邦久土  
馬剩儀衛金書炫庭牖忠義夙所欽再拜酌江酒憶當  
宋社南君臣竄身走將軍起田間意氣最雄赴孤城江  
海上日日事攻守中原天弗昇竟為敵所有前旌曉不  
揚雄劔夜空吼何人始召亂志士徒殞首當時百戰場  
荒落見沙柳千里幾興廢激烈史官手

金山七詠

金山

樓閣中天起波濤四面降崔嵬千尺影終古鎮長江

妙高臺

東風留客權白日此登臺帆影來無際江聲去不回

善才石

何物瑤琨石龍宮夜不函由來江岸側天造補陀巖

留雲亭

亭子臨孤絕江雲礙不飛時來簷下宿水氣濕僧衣

吞海亭

江風號萬壑峯頂一登臨勢欲吞滄海遊方愜壯心

仙人洞

鬼斧穿山骨明明透一窻仙人時舉武壁立下窺江

郭璞墓

落日江心墓淒涼郭景純桑田不可測撫掌笑山人

瓜州遇同年鮑栗之通判二絕

滿路人稱鮑叔賢一尊相見暮江邊長安陌上看花處

回首春風十四年

楚山如畫水如藍鄉思紛紛漸不堪  
今夜瓜州灘上宿便從江北夢江南

揚州

東風吹徹晚陰晴兩岸新無一榷橫  
去我青山如避俗向人黃柳欲傾城  
潮回海口鹽船上春入淮南米價生  
二十四橋漁唱遍嫦娥應識古今情

江日輝輝下廣陵客邊吟興偶然增  
宋軍水砦多編戶

隋帝離宮半屬僧，鷺鴨似便春雨數樓臺。爭出暮雲層  
往來總戴承平福，莫問從前幾廢興。

瓊花

貪看江都第一春，龍舟元不為東巡。閒花亦自能傾國，  
何況當時解語人。

憶在姑蘇與顧天錫郎中語，次亦有亡弟之感  
慘然對泣不能自勝，因追次其韻一首

泉下應無日再暉，一燈寥落伴僧扉。重陽為爾愁看菊

未老憑誰共采薇  
妙質固應天最斲  
芳年真與世輕違  
等閒不敢娛親側  
忍見同時舊綵衣

過高郵湖

曉發孟城驛  
人家過淺塘  
日華初耀水  
風力正開洋  
竹纜收蛇虺  
蒲帆列鴈行  
客心還自喜  
今夕到淮陽

予謁告還朝道出淮陰方傳漕運總戎平江伯

過訪而侍御尹君性之奉命巡貴州艤船之

際得邂逅焉性之出示閣老壽光劉先生贈



行之作謹步韻一首奉別而蒹葭倚玉之誦  
所不能免云

兩岸垂楊石漬苔皇華新館晝長開方傳漕運將軍出  
忽見分司御史來當道豺狼應退避忘機鷗鷺莫驚猜  
相逢却愧無佳句硯匣經旬積暗埃

漂母祠

祠必楚王開國時  
所建者非漢意也

一飯難忘老嫗恩崇祠應出舊王孫平生推食蒙知己  
肯不捐軀答至尊

淮陰侯廟

楚王被誅反狀未明前人固有定論予獨於其下  
齊烹酈食其事有遺恨焉

鐘室堪嗟走狗烹反形千古未分明史官獨為將軍惜  
不念當時老酈生

次清江浦邵文敬吳文盛二主事邀飲寄寄亭

中夜放舟至清口曉渡淮至清河乃別

杏花紅爛竹梢青水次新開寄寄亭共挽行裝春送酒

還催搥鼓夜揚鈴風悲舊楚遙聞樹天入長淮下見星  
記取客邊分去住驛樓殘角夢初醒

懷賢詩

國家財賦歲取給于東南十餘郡而尤莫難于漕  
事文武重臣對江開府者數十年矣成化己亥之  
春予謁告自新安還朝歷其境率聞父老談故平  
江伯陳恭襄公工部尚書周文襄公多至感泣乃知  
忠賢之有益于人國如此賦古詩二章致懷仰之

私馬

平江伯陳恭襄公

赳赳陳將軍平江始開國少年八石弓勇氣屢破賊竭  
逢中興主得附昇天翼當宁念豐鎬京邑望南北安得  
蕭與韓晏歲足兵食將軍家合肥老大諳稼穡一朝被  
簡知舞蹈奉明勅建牙淮水陽諸路盡承式孜孜竭衆  
智疏鑿靡餘力馭庾便交輓隄牖濟危番艘舸隨淺深  
湖壩幾通塞百年民力蘇萬里海濤息居然奠東南不

復困供億將軍去幾時寢廟見顏色火旗與雲馬夜下  
不可測父老說遺事往往動遐憶征夫多苦辛國本在  
培植賢孫今代將當復守成則東風吹客舟清口日初  
是公忠夙所欽再拜讀銘刻

工部尚書周文襄公

周公起江右歷官大司空文章夙有志嘗叩蓬萊宮願  
藉九天寵致身列宿中刑曹得良譽藩輔無全功南畿  
與西浙國賦憂難充主上屢顧之政柄付此公肩輿行

列郡活計歸深衷倉困日委積貨布時通融出納有盈  
縮歲事無豐凶坐令數千里民力不告窮紛紛兩京道  
續續舟車通隣封借羨餘邊檄分陳紅東南二十年一  
老如旣懔云胡事弗偶讒起驚宸聰公歸浩難期民患  
嗟無終所在貌公容如奉家主翁我生已遲暮素仰先  
達風茲來識民隱非獨曠澇蝨文法豈不密治効將無  
同公名當益顯日與江流東

古城驛過南京參贊機務兵部尚書薛公詩以

送之並謝惠祭

樓船三月下江東  
獵獵旌旗暖受風  
林壑有情歸謝傅  
廟堂何意起裴公  
貔貅作隊迎新詔  
龍虎分疆擁舊宮  
幕府勳勞應日盛  
軍儲魯贖幾元戎

賤子乘春上石渠  
喜逢先達艤舟餘  
當牀幸展梁生拜  
乞米寧工魯郡書  
岸雨綠苗方淨好  
水風黃柳共虛徐  
相違無限通家意  
請向諸郎報起居

宿遷早發

驛店蕭蕭雨落水村喔喔鷄鳴推枕偶然夢覺沿河已  
有人行

暮雨夜泊

黑風摧山雨如注未到下邳無泊處暗中雜選人語聲  
且逐淮南漕舟住淮南漕舟三百強粉字舵樓成堵牆  
輪更轉箭鎮相續似覺人人嫌夜長滅燭悠然倚牀坐  
遠村曙鷄聞一箇前途早有役夫來岸東相呼岸西和  
祁州上巳與范嘉龍御史舟中小酌



偶爾相逢泗水濱一舟誰主復誰賓論心久已同清白  
不作平時袂契人

過呂梁洪遇管洪王主事

山形四面合水道一支通亂石東西岸驚濤上下洪懋  
遷充國用疏鑿仰神功使館勞晨爨征帆快午風

徐州飯管洪尹珍主事家有懷亡弟

去年過彭城朔風蕭蕭征馬鳴今年過彭城東風渺渺  
扁舟行漸覺此身為客慣才見花飛又花綻南去北來

曾幾時隨陽却似雲中鴈九里峯前春草芳百步磯頭  
春水長偶然一飯剪銀燭行河使者尚書郎逍遙堂空  
誰作主感慨當時對牀語歸來展轉不成眠獨倚蓬窓  
聽風雨

夾溝道中

獵獵風帆水滿塘明明春岸柳成行連村犬不驚薪女  
傍渚鷗全識權郎官牖聚舟多漕運野田空屋半逃亡  
推蓬不見青山色始覺風光是異鄉

歌風臺

風雲無限故鄉情  
酒半登臺奏楚聲  
富貴一般遊子意  
錦衣何似袞衣榮

與提學婁克讓御史飯泗亭驛舟晤言甚洽

士行先出處治道本懲勸  
持此律今古有若執符篆  
大義苟失之如水決隄堰  
寥寥千載下聖哲炳垂憲  
不見東隣女芳歲甘自獻  
大節一以虧容質徒秀曼  
亦有主家者恃長足私願  
好惡苦怫人骨肉變讐怨  
乃知君臣

間秉德兩宜健庶幾三代風必世可延蔓婁公天下士  
於我情繾綣長途傾蓋中共此一升飯誓當致身來不  
辱青紫植諒哉同心言功名及時建相期在白首保作  
無瑕瑛

舟中清明有感寄克儉弟

兄弟而今一半存想君愁上鵲鴿原紙錢麥飯南山路  
死別生離兩斷冤

濟寧夜雨感懷聞外叔舅侍御李公已赴山東

憲副

自逐東風過大江起居終日對船窓  
夢隨野鶴孤飛健身似山僧百慮降  
人影向燈春寂寂水聲和雨夜淙淙  
猶餘一寸思情在不覺晨鐘隔坐撞

風入松

草橋阻  
風雨作

蕭蕭陰雨漸經旬有意暗推春林鳩來往綠何事聲不  
住故惱征人沒脚泥壅岸尾打頭風斷河濬逢推蓬偏  
感異鄉身歸夢夜來頻江南江北家千里心隨航去住

無因兀坐悄然自數半生多少苦辛

道中有感

千里徐滕路愁雲慘不開使方求郡瘼天未恤民災餓  
殍填途卧浮屍蔽水來圖存歸盜賊忍愛鬻嬰孩行乞  
無人顧生於死更哀勸分遭吏毒貧與富俱摧不任驅  
征役相甘食棄骸一時輕轉竄幾日可招徠漢詔先懲  
已周官重理財憂勤勞主上調變仰元台倘及收麩麥  
猶堪濟草萊歲功曾預講國本在深培望望諸侯境紛

紛御史臺豈無同志者空復淚盈顙

遇汪文燦御史南歸報兩小兒汪保祖保俱安

好

久別憐雙壁舟中數夢之不圖逢故友親說見吾兒對  
客能祇揖延茶請誦詩寥寥千里外足慰一春思

過分水廟戲成櫂歌六章

濟河潺潺向北流濟河灑灑向南流官船私舶都過此  
南來北去幾時休

一條河裏兩般風南客張蓬北落蓬天公只是無心子  
有心人莫怨天公

龍王廟前石作隄馬頭灣脚路成泥莫笑水流分彼此  
只緣地勢有高低

東岸人家開飯奩西岸人家垂酒帘傳道行人莫輕買  
今年沽價十分添

供應船頭金彈丸醉坐船裏珍饈盤有人推蓬憐餓殍  
大家說是秀才官



老郎倚鐘開淺洲小兒曳纜送官舟朝朝去見垂楊柳  
不管流離苦到頭

次荆門管河楊郎中求題水墨葡萄

空中忽散摩尼珠一一牽動驪龍鬚  
鮫人淚莫盡升斗  
賈胡價可論錙銖居然月上蜿蜒架  
真宰有心愁幻化  
玄香隱隱凝不飛瘦影離離巧相亞  
良工近來人未知  
日觀不來還數誰乳酒年來熟銀甕  
客星終夜窺端池  
關西夫子行河使寶繪堂中了公事  
底須滿摘水晶盤

眼飽令人發詩思

過聊城縣境

策士知仁義千秋一魯生紛紛當日事春水下聊城

武城

千載武城縣依然魯水涯民生如不遂弦誦亦何為

乘月夜發二鼓至甲馬營

曉色蒼蒼下武城解舟還趁月中行河流曲寫之玄字  
漁唱清傳欸乃聲隨處倚蓬吟不盡邇來歌枕夢難成

燈前未暇呼津吏問是何年甲馬營

次德州簡管糧張道濟主事同年

一冬南去一春還歷盡征途水與山却憶故人清話處  
隔城相望夕陽間

良店道中大風夜作野泊安陵達曉風息趨連

窩

我行滄景路渺渺夜過亥東風何太顛勢欲簸鯨海盤  
渦如甯旋駭浪若山嵬崩騰沙口決斬剝岸形改官舟

浮一匏出沒漸危殆牽夫屢前却舟子失精采無乃蛟  
龍怒或恐鼃鼃餒合力眠高桅擇地艤而待家人走彷徨  
船頭設醢醢相呼酌馮夷亦欲訴真宰狂飈俄爾恬  
愁雲散其靉張帆下中流擊楫歌欵乃起望推雙蓬喜  
氣人百倍向來得失心悠悠竟安在

留別滄州守禦趙將軍詩

臨河高堞古滄州一將分符得上游充國由來好孫子  
營平終襲漢家侯

骨肉相違歲幾更  
偶然離合更闌情  
家傳只有龍韜在  
一卷殷勤付館甥

橫海軍聲震朔庭  
土人多失舊圖經  
高原何處藏弓劍  
落日寒雲蔓草青

滄古重鎮也承平罷戍久矣近方城之而設守禦之  
兵河間千戶侯趙將軍恂以才畧被選來署軍事上  
下翕然稱為得人成化己亥予自江南省覲還朝道  
出於滄而予從女弟適將軍之子瑛故入城相款者

竟日姻舊之好眷眷不得已輒賦三絕留其家子嘗  
考家譜先世有名曰華者唐末父子兄弟相繼為節  
度使守滄州號其軍曰橫海其葬處猶存而土人訛  
為知節之墓子因辨於郡志中屬以名命送歸官舟  
匆遽不能披尋遺跡以盡鄙懷也故詩及之

為趙守禦題溪雲居士水墨龍

陰風蕭蕭吹急雨龍子相將乞龍乳隨潮上下不可撓  
頭角疑能作人語溪雲畫手工不工撫景還思陳所翁

早歲安能慰民望  
青天白日驅豐隆

靜海道中地名楊柳青園林隱映可愛

春陰澹沲綠楊津  
兩岸風來不動塵  
一日船窓見桃李  
便驚身是卧遊人

直沽望海

擊楫中流亦快哉  
海門春放一帆開  
五更日透烟霏出  
萬里風推雲浪來  
壯志不驚龍窟宅  
竒觀初識鳳樓臺  
行邊歷歷魚鹽士  
倘有平時出衆才

楊村逆風通夕

忽忽無言裏悠悠不寐中  
短檠流絳蠟陰牖落青蟲  
人幸窺蓬月天慳上水風  
白河三百里羈思浩無窮

通州道中

夾岸搖搖酒幔長  
野人漁牧自成莊  
商征曉集河西務  
漕粟春投水次倉  
幾箇鶴巢依古樹  
一聲鷄唱出柔桑  
眼中漸覺風光好  
直北紅雲是帝鄉


張家灣



張家灣口望都城猶是行人半日程  
羸馬似龍諳舊主  
臨河相顧一長鳴

入都城

十里紅塵馬首翻  
眼中不改舊顏垣  
征夫引躅猶穿巷  
穉子迎懽正及門  
襍被幾時淹驛路  
衣冠明日叩天閭  
往來敢憚關河險  
得遂私情是主恩



皇朝文集卷六十八